



# SLUŽBENE NOVINE TUZLANSKOG KANTONA

GODINA 10 • TUZLA, UTORAK, 30. SEPTEMBAR 2003. GODINE • IZDANJE NA BOSANSKOM JEZIKU • BROJ 9

193

Na osnovu člana 24. stav 1. tačka c) Ustava Tuzlanskog kantona ("Službene novine Tuzlansko-podrinjskog kantona", br. 7/97 i 3/99 i "Službene novine Tuzlanskog kantona", br. 13/99, 10/2000 i 14/02), na prijedlog Vlade Tuzlanskog kantona, Skupština Tuzlanskog kantona, na sjednici od 9. 9. 2003. godine, donosi

## ZAKON

### O IZMJENAMA I DOPUNAMA ZAKONA O VODAMA

#### Član 1.

U članu 36. stav 1. tačka 10. Zakona o vodama ("Službene novine Tuzlanskog kantona", broj 15/99), poslije riječi: "voda" briše se tačka i dodaje tekst koji glasi: "izuzev stambeno-poslovnih objekata čije tehnološke otpadne vode mogu uticati na promjenu kvaliteta voda".

Poslije tačke 10. dodaje se nova tačka 11. koja glasi: "11. građenje ili rekonstrukciju autopraona i autoservisa".

#### Član 2.

Poslije člana 56. dodaje se novi član 56.a koji glasi:

#### “Član 56.a

Zone sanitarne zaštite i zaštitne mjere za izvorišta voda koje se koriste ili planiraju da koriste za piće, čija se izvorišta i zaštitne zone prostiru na području jedne općine, utvrđuje općinsko vijeće te općine odlukom o zonama sanitarne zaštite i zaštitnim mjerama, na prijedlog korisnika.

Za izvorišta čije se zone sanitarne zaštite i zaštitne mjere prostiru na području dviju ili više općina, odluku o zonama sanitarne zaštite i zaštitnim mjerama donosi Vlada Kantona. Donošenju odluke prethodi prijedlog odluke o zaštitnim zonama i zaštitnim mjerama koji utvrđuju nadležna općinska vijeća. Utvrđivanju prijedloga odluke o zonama sanitarne zaštite i zaštitnim mjerama od strane nadležnih općinskih vijeća, prethodi prednacrt odluke o zonama sanitarne zaštite i zaštitnim mjerama koji sačinjava korisnik.

Veličina i granice zona sanitarne zaštite i zaštitnih mjera utvrđuju se istražnim radnjama i stručnim elaboratom, urađenim od strane organizacije registrovane za tu vrstu radova.

Odredbes prethodnih stavova ovog člana odnose se na sva izvorišta koja se koriste ili planiraju da koriste za piće što uključuje javne bunare, javne česme, mjesne, grupne, općinske i kantonalne vodovode, kao i na mineralne, termalne i termomineralne vode za piće.

Donosilac odluke o zonama sanitarne zaštite i zaštitnim mjerama jedan primjerak odluke dostavlja Ministarstvu.”

#### Član 3.

U članu 85. stav 2. tačka 5. mijenja se i glasi:

“5. odluka o zonama sanitarne zaštite i zaštitnim mjerama,”

#### Član 4.

U članu 91. stav 1. riječi: "ocjenjenim potrebama" zamjenjuju se riječima: "stručnim elaboratom".

Stav 3. člana 91., briše se.

#### Član 5.

Poslije člana 100., dodaju se novi članovi 100.a i 100.b, koji glase:

#### “Član 100.a

Ako utvrdi da postoji povreda odredaba ovog zakona ili propisa donesenih na osnovu njega, kantonalni vodoprivredni inspektor će pismeno konstatovati nepravilnosti i nedostatke, te rješenjem odrediti mjere i rok za njihovo otklanjanje.

Pored ovlašćenja i dužnosti određenih posebnim zakonom u slučaju iz stava 1. ovog člana, kantonalni vodoprivredni inspektor ovlašćen je i dužan da:

1. naredi obustavu izvođenja radova, sađenje ili sječu drveća i izgradnju objekata iskorišćavanja voda, ispuštanje otpadnih voda i vađenja materijala iz vodotoka, ako se vrše protivno vodoprivrednoj saglasnosti i vodoprivrednoj dozvoli ili se vrše bez vodoprivredne saglasnosti i vodoprivredne dozvole a propisana je obaveza njihovog pribavljanja, i odredi rok za podnošenje zahtjeva za izdavanje vodoprivredne saglasnosti i vodoprivredne dozvole;

2. naredi rušenje objekata i postrojenja i uklanjanje drveća izgrađenog odnosno zasađenog bez vodoprivredne saglasnosti, ako u roku, određenom rješenjem kantonalnog vodoprivrednog inspektora, nije podnesen zahtjev za izdavanje vodoprivredne saglasnosti ili ako je podneseni zahtjev pravosnažno odbijen;

3. naredi privremenu obustavu rada odnosno obavljanje djelatnosti preduzeća ili drugog pravnog lica ili dijela preduzeća ako utvrdi da otpadne vode sadrže opasne materije u količini većoj od dozvoljene ili se zahvataju veće količine od dozvoljenih;

4. zabrani preduzimanje radnji koje nisu dozvoljene po ovom zakonu.

#### Član 100.b

Protiv rješenja kantonalnog vodoprivrednog inspektora može se izjaviti žalba ministru poljoprivrede, šumarstva i vodoprivrede.

Žalba protiv rješenja kantonalnog vodoprivrednog inspektora odlaže izvršenje rješenja, osim kada se donosi usmeno rješenje i odmah naređuje njegovo izvršenje, u slučajevima propisanim zakonom.”

## Član 6.

U članu 103. stav 1. dodaje se nova tačka 4. koja glasi:  
 “4. ako ne izvrši rješenje kantonalnog vodoprivrednog inspektora u ostavljenom roku (član 100.a).”

## Član 7.

U članu 104. stav 1. dodaje se nova tačka 21. koja glasi:  
 “21. ako ne izvrši rješenje kantonalnog vodoprivrednog inspektora u ostavljenom roku (član 100.a).”

## Član 8.

Poslije člana 111. dodaje se novi član 111.a koji glasi:

## “Član 111.a

Na sva pitanja koja nisu uređena ovim zakonom primjenjuju se odredbe federalnog Zakona o vodama i odredbe federalnih podzakonskih akata.”

## Član 9.

Ovaj zakon stupa na snagu osmog dana od dana objavljivanja u “Službenim novinama Tuzlanskog kantona”.

Bosna i Hercegovina Federacija Bosne i Hercegovine TUZLANSKI KANTON Skupština	Predsjednik Skupštine Tuzlanskog kantona  <b>Amir Fazlić, v.r.</b>
Broj: 01-02-392-4/03 Tuzla, 9. 9. 2003. godine	

## 194

Na osnovu člana 24. stav 1. tačka c) Ustava Tuzlanskog kantona (“Službene novine Tuzlansko-podrinjskog kantona”, br. 7/97 i 3/99 i “Službene novine Tuzlanskog kantona”, br. 13/99, 10/2000 i 14/02), na prijedlog poslanika Čamila Ahmetovića, Skupština Tuzlanskog kantona, na sjednici održanoj 9. 9. 2003. godine, donosi

**ZAKON**

**O IZMJENAMA I DOPUNAMA ZAKONA  
O OSNIVANJU JAVNE USTANOVE  
MJEŠOVITA SREDNJA ŠKOLA U SAPNI**

## Član 1.

U Zakonu o osnivanju Javne ustanove Mješovita srednja škola u Sapni (“Službene novine Tuzlanskog kantona”, broj 7/03) u članu 8. stav 1. mijenja se i glasi:

“Sredstva za osnivanje i rad srednje škole u iznosu od 2.000,00 KM obezbjeđuju se iz budžeta Kantona”.

## Član 2.

U članu 11. stav 2. mijenja se i glasi:

“Osnivač je potpuno odgovoran za obaveze ustanove do visine osnivačkog uloga”.

## Član 3.

Ovaj zakon stupa na snagu danom objavljivanja u “Službenim novinama Tuzlanskog kantona.”

Bosna i Hercegovina Federacija Bosne i Hercegovine TUZLANSKI KANTON Skupština	Predsjednik Skupštine Tuzlanskog kantona  <b>Amir Fazlić, v.r.</b>
Broj: 01-02-502-6/03 Tuzla, 9. 9. 2003. godine	

## 195

Na osnovu člana 24. stav 1. tačka p) Ustava Tuzlanskog kantona (“Službene novine Tuzlansko-podrinjskog kantona”, br. 7/97 i 3/99 i “Službene novine Tuzlanskog kantona”, br. 13/99, 10/2000 i 14/02), na prijedlog Komisije za izbor i imenovanja Skupštine Tuzlanskog kantona, Skupština Tuzlanskog kantona, na sjednici od 9. 9. 2003. godine, donosi

**ODLUKU**

**o verifikaciji mandata poslanika u  
Skupštini Tuzlanskog kantona**

## I

Za poslanike u Skupštini Tuzlanskog kantona verifikuje se mandat dodijeljen slijedećem kandidatu na listi stranke SDA - Stranka demokratske akcije, Bajrić Mehi i mandat slijedećim kandidatima na listi stranke SBiH - Stranka za Bosnu i Hercegovinu, Ivanović Slavici i Jahić Fikretu.

## II

Ova odluka stupa na snagu danom donošenja, a bit će objavljena u “Službenim novinama Tuzlanskog kantona”.

Bosna i Hercegovina Federacija Bosne i Hercegovine TUZLANSKI KANTON Skupština	Predsjednik Skupštine Tuzlanskog kantona  <b>Amir Fazlić, v.r.</b>
Broj: 01-02-491-4/03 Tuzla, 9. 9. 2003. godine	

## 196

Na osnovu člana 24. stav 1. tačka c) Ustava Tuzlanskog kantona (“Službene novine Tuzlansko-podrinjskog kantona”, br. 7/97 i 3/99 i “Službene novine Tuzlanskog kantona”, br. 13/99, 10/2000 i 14/02), a u vezi sa članom 13. Odluke o kreditiranju projekata razvoja i zapošljavanja iz novčanih sredstava ostvarenih prodajom preduzeća u procesu privatizacije na području Tuzlanskog kantona (“Službene novine Tuzlanskog kantona”, broj 12/02), na prijedlog Vlade Tuzlanskog kantona, Skupština Tuzlanskog kantona, na sjednici od 9. 9. 2003. godine, donosi

**ODLUKU**

**o davanju saglasnosti na odluku o odobravanju  
kredita DD Fabrici sode Lukavac**

## I

Daje se saglasnost na Odluku Vlade Tuzlanskog kantona o odobravanju kredita DD Fabrici sode Lukavac.

## II

Odluka stupa na snagu danom donošenja.

## III

Ova odluka bit će objavljena u “Službenim novinama Tuzlanskog kantona”.

Bosna i Hercegovina Federacija Bosne i Hercegovine TUZLANSKI KANTON Skupština	Predsjednik Skupštine Tuzlanskog kantona  <b>Amir Fazlić, v.r.</b>
Broj: 01-02-508-2/03 Tuzla, 9. 9. 2003. godine	